

INUIT ATAQATIGIIT

INATSISARTUNI



UPA16/143

30. maj 2016

Sara Olsvig

**Qanoq iliornikkut sulinerup imminut akilersinnaasunngorlugu aaqqiivigineqarnissaa,
isumaginninnikkullu ikorsiissutit sulileqqinnissamut aporfijunnaarlugit
aaqqiivigineqarnissaat pillugu apeqquteqaat aallaavigalugu oqallinnissamik
siunnersuut.**

(Inatsisartunut ilaasortaq Anthon Frederiksen, Partii Naleraq)

Sulineq imminut akilersinnaasariaqarpoq. Qineequsaarnerni kingullerni arlalinni partiit tamangajatta taama oqartarpugut. Pissutsillu Nunatsinni atuuttut aaqqittariaqarput.

Suliffissaaleqineq annertuvoq. Kisitsosit ilorraap tungaanut ingerlarpasikkaluartut inuaqatigiinni suliffissaaleqinermik eqqugaasut inuttut atugaat inuttullu inuunerminni inuaqatigiinnut peqataasutut tunniussaqartutullu misigissallutik pisinnaatitaaffegarnerat puigunngisaannassavarput. Suli suliffissaaleqinermik akiugassaqaagut ataatsimoorlatalu tamanna suliariressavarput.⁶

2016-mut aningasaqarnikkut ingerlatsineq pillugu nalunaarusiaq attassisinnaanermullu siuariartornermullu pilersaarummik imalik, maani ulluni tulliuttuni aamma oqallisigisassarput, aaqqissusseqqinnisanik aggersunik naalakkersuinikkullu anguniakkanik imaqarpoq. Sulinerup imminut akilersinnaanera pillugu anguniagaqarnissaq arlalinnik iliuuseqarfingineqarniarpoq.

Inuit Ataqatigiit isumaqataavugut akileraartarnikkut aaqqissusseqqinnissaq iliuusissat pingaarnersaat ilaattut inissismasariaqartoq.

Attassisinnaanermummi siuariartornermullu pilersaarummi allassimasut ilaat inuaqatigiinni ilumut atuuttusoq uppernarsisarparput. Tassani ima ilaatigut allassimavoq: "Assersuutigalugu kisimiilluni pilersuisumut marlunnik meeralimmut suliffeqarnerup sunniutaat annikitsupilussuuvoq, appasissumillu isertitaqartuusunut pingasunik amerlanernilluunniit meeraqarneq aningasaqarnikkut isigalugu akilersinnaanngilaq. Kisermiilluni pilersuisumut pingasunik meeralimmut meeqqerivimmiititaqartumut ilanngaateqarluni taarsiivigineqarsinnaassuseq 100 pct. sinnersimavaa.

Taamaattumik kisermiilluni pilersuisoq pingasunik meeralik – inississukkatut tunngavigisat ilanngulligit – suliffeqarfiup avataaniinnermini amerlanernik atugassaqassaaq.

Nuliariinnut assingusunik naatsorsuusiortoqarsinnaavoq, pisuni aalajangersimasuni nulialiit marlunnik amerlanernilluunniit meeraqarpata angajoqqaanut tamanut suliffeqarfiup avataaniinnissaq iluarnerusarluni." (Attassisinnaanermut siuariartornermullu pilersaarut, qupp. 134).

Issuakkat ima paasisariaqarput: Nunatsinni ikorsiissutit akissarsiallu qaffasissusaat imminnut naapertuitinngillat.

Inuit Ataqatigiinniilli erseqqissumik oqassaagut aaqqiissutissatut isiginnginnatsigu ikorsiissutit appaavigissallugit. Ikorsiissutinik inuussuteqartariaqartut ilaqtariit inuillu assigiinngitsorpassuarnik peqquteqarlutik tassunga inississimapput. Inuttut atukkat, suliffissaaleqineq suliffissaqanngimmat, tarnikkut artorsaateqarnerit, imigassamik ikiaroornartumilluunniit atornerluinernit aniguisinnaannginnerit, allallu. Inuillu ikiortariallit inuaqatigiittut isumassornissaannut pisussaaffeqarpugut taakkuusariaqanngillallu aaqqiiniarnermi aallerfigineqartut.

Illuatungaajuna isigisariaqaripput: Ullumikkut Nunatsinni suliffeqarfefqarpoq ima appasitsigisunik akissarsiaqarfiusunik inuuniarnermut, ingammik qitornaqaraanni, artukkiisartunik. Taannaavorlu aaqqiivigineqartariaqartoq.

Innuttaasut nunatsinni ikiliartorput, ernumanaannartumik. Meeraqarneq, aamma marluk-pingasunik amerlanerusunik piukkunnartunngortittariaqarpapput. Taakkupummi siunissami Nunatsinnik nangitsisussat pilersuisussallu kinguariinnik maannamit utoqqaliartortussanik. Aningaasaqarnikkut ingerlatsinermut nalunaarusiami aamma allassimavoq pisortat tassaasut Nunatsinni sulisitsisut annersarigaat " taamaammallu pisortat suliffeqarfifiini akissarsiat ineriartornerat namminersortut suliffeqarfutaanni akissarsiat ineriartornerannut naleraasapoq. Pisortani akissarsiat qaffariaataasa appasitsinneratigut tamanna namminersortut suliffeqarfutaannut sunniuteqartinneqarsinnaavoq, taamaalillunilu nunatta unammillersinnaassusaata pitsangortinneratigut suliffinnik pilersitsisinnaanermut periarfissanut sunniuteqarluni.".

Inuit Ataqatigiit isumaqataavugut akissarsiat qaffasissusaat nunatta aningaasarsiorneranut tunngatillugu mianersuuttariaqartut. Isumaqpugulli inuttut atukkatigut pissutsit pivusut ilisimaarilluarlugit politikki tamatumunnga ingerlanneqartariaqartoq. Akissarsiatigut ima appasitsigisumik inissismasoqarpoq ulluinnarni akiligassat akissaqartinneqarneri killeqarujussuarlutik, ilaqtariillu akissarsiakinnernut ilaasut inuaqatigiinni pissakinnertut inissismasuupput aamma, aali suliffeqarlutik. Ataqatigiinngittoqarpoq. Pissakinnerit aallerfigeqqinnagat suliassat allatut suliassaasutut isigaarput. Isumassoqatigiinneq qitiavoq, nammataqarsinnaasuuusullu aallerfigineqassangippata, nammataqarsinnaarpianngereersut aallerfissatut kiserngorutissapput. Politikkikut suna tunngavigineqarniapa? Taannaavoq naleqartitanut tunngasoq akornatsinni sukumiisumik eqqartugassarput.

Iliusissat tikkugassat arlaqarput. Aningaasaqarnikkut ingerlatsinermut nalunaarut qiviaqqissagutsigu tassani Naalakkersuisut sulinermut ilanngaat equnneqartariaqartoq tikkuppaat. Inuit Ataqatigiit apeqquserparput tamannarpiaq pitsaanerpaassaneroq. Inuaqatigiinni naligiinnginnerup akiornissaani sulinermut ilanngaat suliffeqanngitsunut iluaquatasussaanngimmat, suliffeqanngitsullu suliffeqartullu akornanni atukkatigut naligiinnginnermi quppaq annerulersittussaallugu. Ataatsimut naligiinnginnerup annikillinissaanik siunertalinnik iliuuseqarnissaq oqaloqataaffigissavarput, sulinermullu ilanngaat tamatumani eqqartueqataaffigissallutigu piareersimavugut, allatigut aamma qanoq aaqqiinissat pillugit isummavut anguniakkavullu illuatungerisatsinnit ammafigineqarnissaannik aamma uatsinnut neriorsuisoqarsinnaappat. Nangittumik sulinerup akilerluarsinnaasunngornissaa anguniartuarparput aaqqiissutissanillu ataatsimoorfigisinjaasatsinnik suliaqarnissamut peqataanissatsinnut piareersimavugut. Ataatsimut naligiinnginnerup annikillinissaanik siunertalinnik iliuuseqarnissaq oqaloqataaffigissavarput, sulinermullu ilanngaat tamatumani eqqartueqataaffigissallutigu piareersimavugut, allatigut aamma qanoq aaqqiinissat pillugit isummavut anguniakkavullu illuatungerisatsinnit ammafigineqarnissaannik aamma uatsinnut neriorsuisoqarsinnaappat. Nangittumik sulinerup akilerluarsinnaasunngornissaa anguniartuarparput aaqqiissutissanillu ataatsimoorfigisinjaasatsinnik suliaqarnissamut peqataanissatsinnut piareersimavugut. Akileraartarnikkut aaqqissuusseqqinnissamut oqaloqatigiinnerit isumaqatiginninniarnerillu aallartinnissaat qilanaaraarput oqaatigeriissavarpullu oqaloqatigiinnissamut piareersimalluinnaratta.

Ilinniartitaanikkut aamma iliuuseqartariaqarpugut. Ilinniartitaanermi ilinniakkat qaffasissut kisiisa sammissanngilagut. Aamma assassornikkut allatigullu pikkorissarnerit annertunerujussuarmik periarfissaattariaqarpavut. Inuit Ataqatigiit tikkugarpus tassaavoq ilinniaritsi, ilinniaritsi oqaatigeqattaaginnarnagu inuup ilinniarusussuseqarnissaa, pikkorissarusussuseqarnissaa piginnaasatigullu nikeriarusussuseqarnissaa inuaqatigiinni kinaagaluaruttaluunniit annertusassagipput. Inuaqatigiittut naleqartitatut inissitsigu inuup

nammineq ilinniarusussuseqarnissaa tassaassasoq meeraq meeraanerminit ilikkagassaa, alapernaassuseqarluni alloriaqqinnissamut inuunermit sumulluunniit killissimagaanni piumassuseqartuarnissaq. Tamatumani meeqqat meeraanermink nukik piumassuserlu taanna pigilerunkku, inersimasunngoreerlutik allaat utoqqanngoreerunik suli piginnaasanik siuarsaanissamut piumassuseqarnissamut piumassuseqarnissaq pivarput.

Ilinniartitaanikkut suli siuarsaanerup saniatigut Inuit Ataqatigiit tikkuarumavarput Nunatsinni inersimasutta akornanni inuit affaasa missaannaat maannakkut allagartartaarlutik ilinniarsimasumma. Suliffissaaleqisut qiviarutsigit taakkua amerlanerpaartaat ilinniarsimanermut allagartaqaanngitsuupput.

Taamaammat allatigut piginnaasaqarnerup nalunaarsorneqartalernissaa naleqartinneqartalernissaalu inuiaqatigiittut suliarisariaqarparput. Suliffissaaleqisut akornanni allagartartaarlutik arlaannnik ilinniarsimasut ikittuinnaapput, nalornissutigineqassanngilarlu ilinniarneq suli aqqtissat pingaarnersaat ilaattut isigigatsigu. Tamatumalli saniatigut piginnaasat pigeriikkavut inuillu nammineerlutik piginnaanerilersimasaat (iformelle kompetencer) atorluarnerulernissaat pigatsigu. Suliffeqarfinni pisortanilu atorfinititsiniarnernut allagartat maannakkut tunngavigineqartarput, aamma tunngavigineqartarnerat qimassanngilarput. Saniatigullu inuiaqatigiittut piginnaasat allat qanoq atorluarsinnaanerlutigit ilikkassallugu aamma suliarisariaqarparput, suliffeqarfinni piginnaasanik qanoq ittunik atorfissaqartitsinerup nalunaarsorluarnerulerisigut. Kingullertut taarusupparput sulinerup imminut akilersinnaanerunissaanik eqqartuinermi sulerusussuseqarneq aamma eqqartorneqartariaqarmat. Inuttut atukkatigut artorsartut amerlapput, aap, inoqateqarpugulli aamma pissutsit atukkatik sungiutiinnarlugit sulerusussuseqarunnaaqgasutut ilisut. Taakkualu tikkuartuinnarnagit kaammattornissaannut qanorlu ingerlariaqqinnissaannut siunnersornissaannut pikkorinnerusariaqarpugut.

Nunatsinni inuttut atukkatigut naligiinnginneq ullumikkut ajoraluartumik annertusiartuinnartoq akiortariaqarparput. Iliuusissat nutaamik eqqarsarfisariaqarpavut. Aqqummi atukkatsinni inunnik katataqannginnissaq pisariaqarpoq, isumassuineq, assigiinngisitaarnermik inissaqartitsineq, isumaginninnikkut ilinniartitaanikkullu siuarsaaneq inoqatinillu qanilaarnermik ikuukkusussuseqarnermillu anersaaqarneq aqqtigalugit.

Suliffissanik nutaanik pilersitsisoqartariaqarnera tamatta aamma isumaqatigiissutigaarp. Aaqqissusseqqinnisanili aggersuni nammaqatigiinneq naleqartitaralugu qanoq aaqqiinissat tigussaasumik eqqartulertariaqarparput, tassaniippormi inuiaqatigiittut nukittuffipput: atugarissaarneq tamanut siammarsaanik ingerlatseriaaseqarneq inuiaqatigiittullu isumassoqatigiinnermik tunngaveqarneq.

Oqallisssiamut siunnersuuteqartumut Anthon Frederiksen-mut Partii Nalerameersumut qujavugut. Sammisaq pingaaruteqaqisoq tamattalu iliuuseqarfiginissaanut peqataaffigisariaqagarput qaquinneqarpoq.